

Incumbensa Wilhelm concernent in "Green Deal" per il Grischun: nizzegiar la protecziun dal clima sco schanza

Las consequenzas da la stgaudada globala tutgan tar las pli grondas smanatschas da l'umanità. Sche l'augment da la temperatura globala na vegn betg limità cleramain sin sut 2°C, vegnan las consequenzas a s'augmentar en ina dimensiun anc pli smanatschanta. Cun l'Accord da Paris davart il clima duai vegnir limitada la stgaudada dal clima sin sche pussaivel 1,5°C. Las emissiuns da gas cun effect da serra duain vegnir fixadas globalmain sin 0 tranter ils onns 2045 e 2060. En il WEF da quest onn ed en il "Global Risks Report 2019" dal WEF ch'è vegnì publicità ordavant, èsi vegnì renvià cun vehemenza a las ristgas da la stgaudada dal clima. Ch'il territori alpin è pertutgà surproporziunalmain da la stgaudada globala mussa en moda impressiunanta la documentaziun "Davos +1.7° konkret: vom Klimawandel zum Klimahandeln".

Avant 3 onns ha il chantun deliberà ina strategia da clima ed ha fixà il basegn d'agir e las finamiras. Las finamiras dal clima concluidas sin plaun internaziunal èn dentant fitg ambiziusas ed il temp per prender mesiras è stgars. Intensivar svelt las mesiras da protecziun dal clima sin tut ils plauns statals, augmentar cleramain l'effizienza en l'utilisaziun da l'energia e da las resursas e persistenza cun ademplir ils basegns restants, èn pia ina necessitad urgenta. Ma s'occupar da la midada dal clima porscha er schanzas. Sche la rata annuala da la sanaziun energetica d'edifizis, ch'è oz fitg bassa, vegn augmentada cleramain, pon vegnir stgaffidas en il chantun Grischun – tenor il studi "Arbeitsplätze für die Bündner Regionen" da l'uniun Energiefragen.GR – circa 1500 fin 2000 plazzas da lavur en tut las regions. Quai è ina gronda schanza per l'economia da construcziun ch'è suttamesa ad ina midada structurala.

Sco chantun da muntogna spezialmain pertutgà fa il Grischun ina buna parita, sch'el surpiglia ina rolla da piunier en connex cun la protecziun dal clima. Las stentas da fin ussa vegnan beneventadas, na tanschan però betg per cuntanscher las finamiras dal clima da Paris e da Katowice. La protecziun dal clima dovra ina intensivaziun svelta che po vegnir cuntanschida cun promover ina clera reducziun da las emissiuns da gas cun effect da serra en l'administraziun, en cooperaziun cun l'economia e cun la societad civila ed er sin plaun legislativ.

En quest senn vegn incumbensada la regenza da preschentar cun emprima prioritad temporal in plan d'acziun cumplessiv "Green Deal per il Grischun" che cuntegna mesiras concretas ed effizientas per la protecziun dal clima inclusiv in plan da finanziaziun e las adattaziuns necessarias da la basa legala. Cun quest plan d'acziun duai il Grischun profitar da las schanzas da la vieuta energetica ed ademplir ina rolla da piunier en connex cun la protecziun dal clima sin plaun interchantunal ed internaziunal.

Cuira, ils 13 da favrer 2019

Wilhelm, Gasser, Geisseler, Aebli, Atanes, Baselgia-Brunner, Berweger, Bigliel, Bondolfi, Brandenburger, Brunold, Cahenzli-Philipp, Caluori, Cantieni, Casty, Casutt-Derungs, Cavegn, Caviezel (Cuira), Caviezel (Tavau Clavadel), Clalüna, Degiacomi, Della Cà, Deplazes (Cuira), Deplazes (Rabius), Ellemunter, Engler, Fasani, Florin-Caluori, Flütsch, Föhn, Grass, Gugelmann, Hartmann-Conrad, Hitz-Rusch, Hofmann, Holzinger-Loretz, Horrer, Jenny, Kappeler, Kasper, Kienz, Kohler, Lamprecht, Maissen, Märchy-Caduff, Michael (Donat), Michael (Castasegna), Müller (Susch), Müller (Favugn), Niggli-Mathis (Grüsch), Noi-Togni, Paterlini, Perl, Pfäffli, Preisig, Rettich, Ruckstuhl, Rüegg, Rutishauser, Salis, Schneider, Schutz, Schwärzel, Stiffler, Tanner, Thomann-Frank, Thöny, Thür-Suter, von Ballmoos, Waidacher, Widmer (Favugn), Widmer-Spreiter (Cuira), Zanetti (Sent), Zanetti (Landquart), Buchli (Tenna), Collenberg, Gujan-Dönier, Holliger, Jegen, Locatelli-Iseppi, Lunghi, Ulber Daniel